

海南先贤诗文丛刊

海南地方文献丛书编纂委员会编纂

海瑞集

下册

(明) 海瑞

海南出版社



海南先贤诗文丛刊
海南地方文献丛书编纂委员会汇纂

主 编 洪寿祥
执行主编 周伟民

海瑞集

下册

(明)海瑞 著

李锦全 陈宪猷 点校



海南出版社



图书在版编目(CIP)数据

海瑞集/(明)海瑞著;李锦全,陈宪猷点校.-海口:海南出版社,2003.1
(海南先贤诗文丛刊)
ISBN 7-5443-0555-4

I.海... II.①海... ②李... ③陈... III.海瑞
(1514~1587)-文集 IV.Z424.8

中国版本图书馆 CIP 数据核字(2002)第 069303 号

海 瑞 集

李锦全 陈宪猷 点校

责任编辑:鄢琨

*

海南出版社出版发行

(570216 海口市金盘开发区建设三横路 2 号)

全国新华书店经销

湖南新华印刷集团有限责任公司印刷

2003 年 1 月第 1 版 2003 年 1 月第 1 次印刷

开本:880×1230 毫米 1/32 印张:31

字数:547 千

ISBN7-5443-0555-4/I·18

定价:80.80 元

海南地方文献丛书编纂委员会

顾	问	陈玉益	蔡长松	周文彰	王学萍
主	编	洪寿祥			
执	行	周伟民			
常	务	郑行顺	袁大川		
副	主	徐 庄	潘在积		
编	委	王经华	李昭淳	刘剑三	
		余 虹	张三夕	张春明	
		侯月祥	倪俊明	唐玲玲	
编	务	杨德禧			



卷之三 序

寿南瀛吴公八十一序

南瀛先生吴公家郭南，自幼以忠信之美闻于党里，虽溺于世俗华靡之中，不安于世俗华靡之习。谷神不死，自天地根，庄、老发之，世之言养生者宗焉。公得天之美，不期近似。已而业郡庠、宾上国，交及天下，貌古心实，识者器之。

藏其虚寂之体而不能显其因应之用，师庄、老而失焉，世有之矣。婴儿未孩，玄关完固，然区区内守无补于人，无裨于天下国家，君子无取焉。弱志强骨，庄、老非为养生计也。养生之秘率不外是：存养立命言其功，还虚久视推其效，无二说也。

公壮年学问，本原于孔孟；发挥充拓，执古为贞宅，御今为应尘，实之庄、老^①。历仕归田，中道若性。瑞尝掇其始末。秀才事业，无传于人，不必言矣。世宗皇帝锐然有为，初年志趣超三迈五，虽土木一役，亦罕有以是当简在者。公晋甲科郎署工部。适承其会，“鲜我方将，经营

四方”，进四品留用，赳赳然世宗之视公大用指日矣。念彼共人，取途权要，公上答天子，下揖相公，凝神抱一，执此而往，泊如也。以此罢归，亦竟以此自信。虽享有田园之奉，而胸次悠然，实超然于富贵之表。怡怡闾里，将若终身。且日规日劝，谋与乡人同归于道。事之苟陷不明，则亦已矣；一有明焉，子姓至亲，法不为讳。失之于前，复之于后，与先日逆睹严氏今日诛亡^②，守一不阿无异。昔张公艺以九世闻，无能改于武后之非，而重高宗隐忍之过，君子尤焉。公不为无忍，不为百忍，白日青天，其心其事，大率如此。用能涤除玄览，开阖天门，敛藏于专气致柔之渊，迅通于冲用不穷之会。惟公得天，惟天寿公，不偶然矣。

瑞公门弟子，所愿百岁师公。今癸酉二月八日，公八十一诞辰也。乡父老子弟谓予知公，征一言为公颂。先得我心，乐共此举。乡人之言又曰：“公父复庵，唐尚书，讳贤秀，为琼始祖。”公绳祖武，发祥有在，复见其天地之心乎？天下之道蔽于是矣，凝神立命，无越于此。复庵独观于复，惟公以复得天。源蓄流长，父作子述。《诗》云：“乐只君子，胡不黄耇！乐只君子，保艾尔后。”公父子以之。并书以颂。

予伤公之未究厥用也，“载营魄抱一”言公，言其心也。荣公之寿，本于复庵，原其自也，道其实也。唐尚书

公世远事湮；言可略云。

寿王尧山六十一序

尧山自幼与予同师友、为学业，其神气之灵，冠诸童稚中，识者异之。予亦歉然于予，谓得天之美不尧山若。稍长业举子文，论文宗诸大家，盛有称许；清逸之气不混尘俗而别为一局，其文类之。以故不能俯就时调、决科第。科第之文非尧山所不能攻，尧山所不屑事也^③。经世论今事，不平之愤有发焉，亦古人好静无为上一层意也。

隆庆庚午，予罢官归，别尧山廿年矣。场屋中尧山终不得一捷，晚充挨食廩日岁贡生^④，又弃去不就，家居万山之中，即此采山钓水，还以物与人，风浴泳归，随地而乐。夫一岁贡生，亦庠序士，途穷而不得不安于小希之不可得者^⑤，尧山弃之。惟我所愿，我则行之。古之人在混芒之中，与一世而得淡漠焉。傍花随柳，鸢飞鱼跃，尧山有焉。说反屠羊^⑥，每闻人说及尧山在万山中^⑦，木石居，鹿豕游，翛然有脱去世故、凌云气、游天地间意。唐人之咏怀有曰：“方同战胜者，去剪北山薇。”予去尧山居三百里许，梦想神交，方醉尧山之乐，意尧山载营魄、抱其一，

静之徐清，形可长生也。

今丁丑九月十有一日，为尧山再甲子诞辰，且室人同生，一堂偕老。宗党戚里争持酒币走贺，谓冀缺、梁鸿、庞鹿门天作之合，于今罕有。因问颂于予。予惟尧山先年下帷经史百家，其学博；作为文章包罗万象，其气豪；谈今不平疾苦，其志愤；经略人间世，曲畅旁通，其识精。今时命大谬，反之身而谋之神者，回视前日之所有事者，又若无有焉。专气致柔，与鱼鸟花木忘其形于天壤之内。古之得道术者盖如此。心与天游，天为培之。夫岂曰不知其雄，守其雌！聚埃积块之守，岂曰以期年耆而无经纬本末，无以先人也哉！

夫妇值今六十又一，平格伊始，而众心戴焉。《诗》云：“令终有俶，公尸嘉告。”用是不辞其恳，备及尧山自幼而今天眷之隆不偶然也，书为尧山千百岁寿。

寿顾母何氏八十三序

天地间和气致祥，乖气为异，此理之必然也。然和气孰为大？曰孝于亲为大。人能孝弟，则其心和顺。即此和顺之心，洞然八荒，皆在我闾。一和之所感召而天下之能事毕矣。

尝以弘宇顾君家庭事观之,其和气之大,萃于一门者乎!弘字母何氏相夫事姑,克尽妇道,先自益和于身矣。天地间和气之祥,固有事适其幸,心迹并之。其不然,则惟心之和而迹不与焉。何也?心可以言和,心不必于其迹;迹亦可以言和,而不能以兼乎其心也。韩昌黎谓欧阳詹生“舍朝夕之养而来京师,其心将以有得于是,为父母荣。虽其父母之心亦然。詹在侧,虽无离忧,其心不乐也;詹在京师,虽有离忧,其心乐也”。太孺人始就建安之养,母和于上,子和于下,不必言矣。先官浙庠,今澄邑令。子宦游数千里外,母留安成,乖违若无甚于此矣。然太孺人愿子道济四方,不愿子为儿女温清膝下。毋剥民、毋利己、上无负君、下无负学、毋以老妇为念之训,顾君朝朝夕夕周旋以之。视无形,听无声,恍若母氏日临在上,己身日临母氏之旁。若是慈训,和顺兴焉,用为澄民一邑之利。有子如此,母心诚不能无快于是也。古称父母俱存,俯仰不愧,为君子三乐之要。心契心感,融融洩洩,虽隔千万里外,如目见之矣。天下之和有大于是者乎?澄邑士民僚属谓弘宇君为祥于兹,有自来矣。

万历甲戌春正九日,太孺人八十三诞辰也,先期乞予言,以纪一时之盛。予母太恭人今八十四,一则以喜,一则以惧,闻言不觉色动。平治天下,舍我其谁?孟子之志,未能或之先矣。所养所发,不过守先王之道,出弟入

孝以待后之学者，亲亲长长而天下平，道无越于是矣。予日侍老母与顾君同，衰病林泉，无复为天下念。“风自火出”，“容保无疆”，举于顾君属之。

用是半轩父严州教授祖后先继美，伍祖姑家有严君奕叶，顾氏长发其祥，无庸及也。正月之吉，为此春酒，数千里母子意，特书其一时之和，为眉寿介也。

贺兵宪见庵陈公荣膺三朝锡命序

先王有至德要道以顺天下，所敬者寡，所悦者众，我祖宗因之。万历初，天子率祖攸行，加惠宇内，爰命内外臣工，得封父母如己官而及其配。先时黜陟幽明，大计群吏，其无功德忝官常不遂其媾者不与也。见庵陈公至是，盖荣膺三朝之命矣。

公世闽长乐人，封君太夫人又奉玺书，峨豸曳绣，族戚称觴以庆，国人遥为见庵公荣之。卫指挥某某日以其事为予诵，祈言以贺。予惟士君子立身天地间，孰不欲其亲偕老，一时金章紫绶，荷天宠光也哉！顾德不足以使媚于天子，因之秩不足以悦于其亲。裕后昭先，孝子不匮，己则然也。

公由进士服官，所至有闻于人。尝阅李三州初稿所

为赠公之文，公平生行业，恍如见之。公能于其官，不待今日之赘矣。令终有俟，其亮功熙载，休扬于世，以显父母，有可为公言者。东坡氏谓才满于天下而事不立，天下之所少者，非才也，气也。气之所加，无大无小，无往不济。兹公兵备我琼，入境之初，正寇酋肆行之际，恃抚而骄，祸机叵测。人众以此观公，然尚以秀才官虚文无胆^⑧，千人一律疑公也。公叱咤间群豪丧胆，俯首约束，置汹汹水火之人而措之衽席之上。公何以得此称异于人哉？人徒以其见畏寇如虎，公以才，以其气，己大物小，不见其为虎也。天下而无大事也，天下而有大事，非其气之过人者，谁则办之？《诗》云：“孝德引翼，四方为则。”然则公之所以荷总百禄，显扬二亲，以承王休，率此措之，内则谦心，外无掩袭，其所及宁可涯哉！国人数其事而称之，如革金壮丁、官当、驿传^⑨、丁粮、民壮，反初日之不均者，与民均之，民之利也。

予独区区于海酋之一言，志其大也。率海之滨，卫所布列，寇无畏焉。气不足以守其才，坐是为累。若公所为，鲜不为则矣。用是书之以为贺。



贺卫所赵侯军政视篆兼督屯序^①

军政例五年一推，万历三年冬忽报卫赵侯思梅如前军政，军余人色喜欣欣，举贺侯之文，诣予为问。夫事无系于君国，无系于州若县地方，不之言可也。祖宗列土而官，无能举于其职，有甚于今日之武人者乎！弧矢之利，以威天下，无武难乎其国矣！请言之，黑子孤悬，内黎外海，窥衅有人，四面敌而诸不遑矣，文政何施！燕雀处堂中，特无倚赖，有甚于此三千里地十一所而卫者乎？请言之，由琼而北十三布政，京师济济布列，有难言矣。特于思梅一武人言之，言之何如？时也，流弊也。文武衣冠，诚自别于祖宗之旧矣。不有天之与我三代直道，求自得师在人者乎？今天下事由书生矣。书生自党，特无有天理人心^①，振古可恃？其大者又岂无有天之与我圣则圣、贤则贤，在我而已，可死可辱，彼书生无得而夺之者乎？战国争雄，孟子有二者天也之说。师文王大五小七，有斡而旋之矣。一王法度，卫使司其品三，所其品五，俯首听命，有扁斯石，典章律例，曾有之乎？前无所闻，尚当自我知，能如百卉结实敷华，酬生造化。目前人不有清水王，我辈武人立之标焉，可以望而趋之者乎？

瑞平生仰止，一人而已。师王而行，惟恐不及。名宦乡贤，琼人无出清水之右。其袭职署印在武宗皇帝初年，武人未至今日之衰。而衰之始也，清水能之于先，曾几何时，今日乃不可能之于后。孟子谓挟太山以超北海，是诚不能。清水行义峻绝，风采无一时俗气矣。要之只是一尘不染，一私无容。闻其政暇便观书史，绝不为今武人酒食嬉群之习。诗文无一传示于人，善读书者也。无搜摘章句之劳，坦然自得其性情之正，谓之非人能也，可乎哉？一时屯政军行，无一不当人心之举。一人倡率，十一所肃如也。虽以之天下无不可者。《诗》云：“虽无德与女，式歌且舞。”由前信后，思梅之惠，人歌舞之矣。予之所取于侯者，则愿侯如清水收盛美之功，不愿侯于无义战中存煦煦之德^②。侯固握篆而总十一所事矣，势不能舍侯他属，况侯沉静优闲质美，可上由清水而入圣，舍侯无可以为望者乎？用是勉之以为贺。

人有元气下陷，立死亡矣，苟非乌附毒剂，无以达之。今者希阔之言，类是乌附，实则和扁参苓，延年久视，非乌附也。天下事亦为之而已。思梅勿以为讶。



贺大尹赵三山荣奖序

有仕于此，承上交下，动见尤怨，诿之曰时势之不可宜者，非也。夫士患无万物一体之心尔，万物一体之心，人皆有之。以我之心将无不协之心，众人之母，解衣推食，无逆于人，不必言矣。大而刑罪之加，小而呵谴之及，风雨霜露，莫非同人于道意也。同人于道，有不得于人者乎？孟子曰：“以善服人，未有能服人者也。以善养人，然后能服天下。”三山赵君令琼，今日月计三季，代巡杨燕山公不及章荐，驰檄奖之。三尹张子奉文行事，揖予乞一言以张其美。先无是例而张子心欲之。二百年来无今尹，言之不可以已也。

夫三尹与丞同称佐贰，韩退之所云漫不可否事，为长官之惟听^⑩。今日体貌大都然也。三山县百务一以家有长兄，无二上自与，宜乎“同寅协恭”之意微，“噂沓背憎”之风炽也。乃三尹惓惓然道三山美不啻口出。盖三山誓不贪泉改心，帝命三十六字养之既有素矣。志在厚民生，使民服化从义，日辞讼中，哀哀赤子，呼冤案前，不忍舍之而曰别为一教道也。因彼竞争，谕之礼义。由慰日勤，罔不劝且戒于农桑，风化日淳淳焉。实心实政，细大兼举，

俗吏视迂阔事，三山直前为之。此何心哉？万物一体之仁，不得而已也。百蠹攸除，百利与兴，见之日行^⑭，莫非万物一体之仁；盖由蓄之中藏，莫非万物一体之义。不获乎上，竟之上之人与其共；不获乎下，竟之下之人仰其泽。僚友同归于道，以弟称。不俗道厚士，隆士于义不于私，诸士子喁喁以凯悌颂。张尹大道为公，渊源有自，家声见于是矣。而实则三山心感心使之也。面谋象恭，不如是也。然则曰难乎免于今之世矣。不己之求，而人之责，其得为论心之当也哉？虽然，三山政尚节气，言冲和尚减分数，天地万物吾一体，有得于光明正大之功，无得于和融浑纯之用，大之似矣，而未始融之也。人人心则如此矣，又此而上，其为感将如之何？三山勉之哉。

天地万物为一体，仁道也。成己治人，道无上于是矣。书之复张三尹，意为三山贺勉。

贺李东城荣奖序

今世官于其地者，治下人往往粉饰词说，借贵人为文，架无为有，增细以巨，裂采书其言进之。谀风行而天下无公议矣。事之可以已，其一也。然亦有出于人心之公，情不容已者。出于公则不出于谀，或德在人心，远迹

同及；或饥食渴饮，临深为高；目前之功，身后千百祀之泽，大小不同，德之不忘于一人也。且颂德之中，监戒存焉。益于其人，因以益于其民，情在是，义又有大焉。予于东城李君见之，言之不可以已。

东城隆庆六年冬任临高县，代巡杨燕山信东城初政，循例奖之，时未及期月也。耆老王廷器、吴应第等造予，征言为贺。其言曰：临称富饶邑，先后令以富饶利之。今日之临，又一临而非昔日矣。我国家官民财法有界限，官自为官俸禄柴马，民自为民盖藏衣粟。柴马俸禄外，毫发属民。枉法不枉法，其为赃一也。赃在官者法无赦。今也不然，我民日就腴削，见促生不见甦息，尽由于此。郡有守，邑有令，圣天子以牧养寄之，如保赤子义也。设官分职，不为不多，有以其子视民者乎？见尹而戚，天下然也，而临远方为甚。东城李侯百有为，为民为之，惟徭赋，惟出纳，听断视若切己事，一有不协，恫瘝在身，一朝夕不能安也^⑤。燕山之奖侯曰：“督攒造，册籍为之一清；增城垣，捍御为之永赖。侯心无不尽之心，事无不宜于民之事。”燕山之所未及知者事，视城册大率相等埒。民颂其才。去冬计今，期月日矣。暮夜入衙，未之有闻也。审册不言常例，听颂不入醵金，民予其节。居官之道，清、慎、勤三者，东城兼而有之。邑人有乐利之欢，念东城为乐利之德。然则是赠也，得非情不可已，出于公，不为谀者乎？

二老又即先后尹比方今日，曰：“其人往矣，政声秽迹播人心口。若今日事，侯与先贤列，难其人而今有之，解倒悬，就衽席，民之不能忘也。”瘝其恶而章其善，二老之言，凛凛然监戒存焉。常目在之，如临师保。裨于其人，因以裨于其民，诚在是矣。情在是，义又有大焉。《诗》云：“高朗令终，令终有俶。”用是予其请，书之采以为贺。

贺景竹王千兵荣膺军政序

圣天子分天下职，下都司卫而立之所焉。所与州县错峙，盖五品秩也。兵以千一百计，余人倍蓰之。所管辖有戎务、有屯粮、讼狱，是其以卫封圉翊我圣明之治，实兼牧养，允厘役焉^⑯。行道遂志，视州县有大者。今守令下民莫敢仰视，人视之不胜其崇且荣。所则不然，其故起于秩袭父祖，不由问学，于官守义懵无所识，且其无理德以和心气也，动辄强悍残厉以凌剥其下。抚按藩臬用是从而抑之，抑之诚是也。沿以成习，遂致厚相党与者牢以坐受爵冕致斥^⑰，显显然中秩之崇，反出文杂流下。居之者恒亦愀然不乐，曰此奴隶冠裳尔。其间志有所尚者，竟亦以莫可奈何付之，莫知所以致此之由，去此之道。

夫人之参其身于天地中者，岂必人之荣我而后能立